

四庫全書

子部

欽定四庫全書

子部

羣書考索後集卷二十二

詳校官中書

臣寶汝翼

主事

臣

祁韻士覆勘

總校官知縣

臣

楊懋珩

校對官中書

臣

徐步雲

謄錄監生

臣

郭洽怡

欽定四庫全書

羣書考索後集卷二十二

官制門

漢官

宋章如愚編

漢世公有三等太師太傅太保為上公丞相太尉御史大夫為三公大將軍驃騎車騎將軍為比公卿有三等前後左右將軍為上卿太常至少府皆稱正卿執金吾

太子太傅將作少府詹事大長秋水衡都尉京兆馮翊
扶風為陪卿大夫有三等二千石為上大夫千石為中
大夫六百石為下大夫大夫之下復有士劉劭爵制曰
自一爵以上至不更為四等皆士也而本表比六百石
有博士之官意者爵自公士至不更官自比六百石以
下至百石皆士秩也丞相與御史大夫稱兩府兼將軍
或稱四府或稱五府光祿勳稱內卿光祿勳王龔以外
屬內卿校書內朝稱朝者博士稱禮官司隸刺史稱奉

使丞相掾吏稱宰士太守稱郡守又稱明府此漢官稱
謂之大几也漢之三公分掌九卿而侍御史則分刺守
相守相則察守尉令長然有事御史下相國相國下諸
侯王御史中執法下郡守有議論則中二千石二千石
博士議郎諫大夫等雜議大率紀綱皆有條緒今自三
公言之漢初以丞相御史大夫太尉為三公其名雖均
而其權實差武帝罷太尉而置大司馬成帝改御史大
夫而置大司空哀帝又改丞相為大司徒而遂正三公

之名方漢之初丞相之權最尊大尉特佐其職而已籍福說田蚡乃曰魏其為相將軍必為太尉太尉相尊等耳至是太尉之權始無異於丞相耳故事御史大夫奏事會廷中差居丞相後不當與丞相均禮蕭望之為御史大夫乃不禮於丞相至是御史之權始不下於丞相惟宣帝能加禮丞相稍抑御史而不使之抗尊武帝寵假大司馬之權而不任宰相故終漢之世大司馬專秉國政而丞相具位行文書大司馬古之六卿掌兵者也自

漢以太尉改置而兵柄不移致使其權在丞相上以貽異日之禍其來遠矣今自丞相而言之漢初選用人才盡出丞相高祖詔郡國舉賢良必遣詣相國府書行義年武帝之初衛綰奏罷賢良治申韓蘄張者竇嬰田蚡推轂趙綰王臧薦人或起家至二千石武帝陰欲殺其權遂增重加官之制朝夕在側以薦導人物嚴助侍中則薦朱買臣衛青侍中則薦主父偃楊得意侍中則薦司馬相如而宰相之權盡矣故公孫弘雖開東閣而不

聞薦士李蔡以後客館丘墟矣不獨此也呂后欲王諸
呂問右丞相陵左丞相平而不及趙堯文帝錢穀斷獄
之問不過右丞相勃左丞相平而不及張蒼是御史大
夫雖名三公特副丞相而已九章之律定於蕭相國收
斂之令文帝亦與平勃等論議而後除是法令之更定
必歸之造命之地羣有司不與焉景帝寵任晁錯多所
變更內史更法定令而列卿未免出位之思御史謀削
七國而已無復副貳丞相之實漢制之壞開端於此迨

武帝抑又甚焉自武帝任中大夫侍中而謂丞相為外朝而內庭之事宰相不與知矣自九卿之更進用事事不關決於宰相也而外庭之事宰相不與知矣自其以吏六百石以上調於尚書也而天下之事宰相皆不與知矣建水衡之官以侵大農之職置中都三十六獄以紊廷尉之權九卿更進用事而事不關於石慶御史言事日肝而事多決於張湯甚者趙禹以中大夫更定律令視造命之地何有焉其後游宴後進始令中書官章

奏霍光以大將軍領尚書其後殆不可言矣今以御史大夫言之漢承秦制以御史副丞相每人主有大事欲與大臣及九卿議則曰制詔御史或羣臣有奏請天子當下與大臣議則曰下御史文帝欲議肉刑則曰制詔御史而兩府同議高祖封陳平曲逆戶口則詔御史而竟行如制書班下諸王國則御史以其制書請於丞相同書而行此之謂御史下相國相國下諸侯王也如制書班下諸郡則御史大夫與中丞同書而不經丞相此

之謂御史中執法下郡守是也以御史乃丞相之副而中丞又御史大夫之副諸侯王尊於郡守故丞相主行其尊而御史大夫主行其卑耳自武帝以來凡事多務率意乃專任御史大夫而使之自行張湯為御史大夫議造白金皮幣等丞相李嚴之徒惟取充位皆不與行兒寬為御史大夫與上議行封禪九卿更進用事初不關決於石慶其後東漢輔相權去政事漸歸臺閣蓋自武帝始矣今自九卿言之京輔豪右非一縣可令故屬

之太常九卿之長列侯屬之主爵尚書主章奏屬之少府皆有本末次第及武帝紛更始置三輔以分太常之權用宦寺為中書謁者而不屬少府自改為三輔而太常之權稍微而主爵之職遂廢至昭帝時遂有三輔太常舉賢良三輔太常縱囚徒之言則太常之職輕矣曩時少府有尚書主文書章奏今置中書而以宦寺掌之是章奏皆不由於廟堂也是以其後恭顯得以肆志於其間廷尉本掌獄也而中都官獄又有二十六所以史

攷之灌夫繫居室復繫都司空是居室都司空皆獄也
謁者詔王商詣若盧詔獄張湯治他囚導官是若盧導
官皆獄也典客有別火獄水衡有上林詔獄中尉有寺
互都船獄至若北軍尉則主上書者獄他如蠶室暴室
皆獄也辛慶忌救劉輔徙共工則共工亦有獄也絳侯
囚於請室則請室亦皆獄也是非紛紛而紊亂乎然九
卿之名按後漢安紀注以奉常光祿衛尉太僕鴻臚廷
尉少府宗正司農為九卿而西漢志所謂奉常光祿勳

衛尉太僕廷尉鴻臚宗正司農少府執金吾水衡都尉
主爵都尉左內史右內史皆號九卿張禹子宏為太常而
傳云官至太常列於九卿張安世子延壽為太僕而傳
云歷位九卿張湯為廷尉而傳云及列九卿收接天下
名士大夫陳咸為少府而杜鄴傳云咸為少府在九卿
高第汲黯為主爵都尉而傳云列為九卿鄭當時為右
內史而傳云至九卿為右內史此奉常至右內史為九
卿之可考者也今自將軍之官言之漢初於左右前後

將軍皆不常置或有事將兵則置之尋亦罷去至武帝外事四夷則無日不置嘗攷將軍之號自春秋時已有故公羊傳稱楚子重為將軍左氏傳稱魏獻子為將軍漢因其號所置不一然惟大將軍最貴次驃騎將軍次車騎將軍次衛將軍又有左右前後將軍文帝自代邸夜拜宋昌為衛將軍薄昭為車騎將軍而車騎衛將軍始有定職武帝就軍中拜衛青為大將軍而大將軍始有常職其後復用霍去病為驃騎將軍上官桀為左將

軍始有驃騎左右將軍之職用趙充國為後將軍韓增
為前將軍始有前後將軍之職其他如師出匈奴則有浮
沮匈奴河浚稽祁連蒲類之號師出兩粵則有伏波樓船
戈船下瀨橫海之號擊遼東則謂之度遼擊西羌則謂
之破羌曰驍騎曰護軍曰輕車曰材官曰代郡曰鴈門
曰二師曰強弩曰六人皆其號也武帝之時又增八校
曰中壘曰屯騎曰步兵曰越騎曰長水曰胡騎曰射聲
曰虎賁凡有八校而刑法志乃曰內增七校蓋胡騎不

常置也其後以特進領城門兵得舉吏如五府武帝雄材大畧一時紛更其弊乃至此哉

漢官

漢之遷轉惟上所命初不以品秩高下為升降故士亦俯首聽命而莫敢有所請張釋之十年不得調揚雄三世不徙官至有為太僕立功自高及文猶未離乎舊職則何其濡滯若此也賈誼超遷歲中至大中大夫公孫弘徙步數年至宰相封侯王仲翁補大將軍長史三歲

至光祿大夫若此者又何其速也彼其黜陟進退雖未必皆當其賢否而用舍之權一出於我固未始有資格之拘然朱博傳云刺史居部九歲舉為守相守相高第遷為中二千石二千石遷為御史大夫御史大夫任職則為宰相雖然此特常典耳其有異材顯効為時君之所識便復不拘此制漢世尊右卑左故號貶秩為左遷而進居高位者則云以為右職周昌自御史大夫為趙相高帝謂曰吾猶知其左遷而陳平為右丞相請以位

遜周勃文帝乃以太尉勃為右丞相位第一平徙為左丞相位第二此即尊右卑左之實也然至於大臣之不職者去之可也收其印綬可也亦奚至於左遷他官以辱之也孔光免丞相博陸侯久之復為光祿大夫位次丞相月餘為御史大夫未幾復為丞相以至韓安國蕭望之翟方進之徒皆以御史大夫左遷為他官彼嘗執天子之政矣嘗正百官而統其權矣今一旦降尊就卑與其僚佐比肩而治事豈所以待大臣哉漢制遷吏三

歲而其他官吏以至倉庫之微初未始有終更之限也
自夏侯嬰事高祖為太僕至文帝世不易其職揚雄為
黃門郎歷三世不徙官此其在內然也有為京兆尹九
年如張敞有為刺史五年如何武有為郡太守八年如
黃霸其在外職亦未嘗不久任也王嘉謂文帝時吏居
官者或長子孫以官為氏其二千石長吏亦安官樂職
莫有苟且之意足以見漢之任吏不輕於易置也苟二
千石治行課最則持璽書褒寵增秩賜金亦未易遷擢

以重斯民去思之心至其屬吏則惟太守察其廉汙而故郡丞雖老聾或以其廉而不欲為數易黃霸曹吏書佐

選其可用者而罷斥諸病吏

朱博

亦安有具貲而終任者

哉當是時惟長安浩穰最為難治而為京兆者雖久不

過三二年近者數月一歲輒毀傷其失以罪過罷

張敞

知漢之久仕固以吏之循良而姦貪闇冗輩亦豈容久

病民哉漢世士大夫自少至老初末始有限也劉向以

二十為輦郎陳咸以十八為郎貢禹之子年十二而元

帝欲官之其入不幾於濫乎劉辟彊以八十為衛尉公孫
弘以八十為丞相趙充國以七十餘為後將軍貢禹以
八十一遷御史大夫是未至於老廢者皆可以綰綬於
朝也平帝元始中龔勝以年老乞骸骨詔策遣之始有
年至致仕不盡其力之詞後漢左雄議限年法四十以
上始舉孝廉是二者得於古人之意也漢無引年之制
大夫告老而歸初不以齒論上印綬乞骸骨天子為之
賜金安車駟馬以寵其行此其常典然有以故祿歸老

于家者張歐周仁萬石君是也有策遣其歸而不敢斥
名者龔勝邴漢是也有聽其罷歸而就問於其家者趙充
國董仲舒是也有不待告謝令奉朝請者張禹孔光是
也若是者又皆一時之特恩所以全其終始尊其道德
養其氣體幾於古人之乞言者矣漢律春曰朝秋曰請
其禮蓋古諸侯之朝聘也後漢和紀注曰奉朝請無員
數三公外戚宗室諸侯多奉朝請按石奮以上大夫祿歸
老于家以歲時為朝請是上大夫之致仕者亦當朝請

也唯病免者乃得曠廢王陵吳王濞之類是也馮參以
列侯奉朝請世祖中興不任功臣以事其加優異者不
過以列侯奉朝請留京師盖取馮參故事也凡百官過
視朝無不朝者至蘓武之復為典屬國蕭望之之賜爵
闕內侯張禹之罷相就第孔光之為太師皆止朝朔望
盖時君特以優之非常典也漢世百官洗沐之制史氏
不著其詳石建為郎中令也傳載其每五日洗沐歸謁
親鄭當時為太子舍人也傳載其每五日洗沐常置驛

馬長安諸郊請謝賓客按此則知五日一暇者乃漢世
官吏之通法薛宣傳云日至休吏東方朔傳云伏日當
早歸意漢世百官休告之期如此者尚衆也惜其無可
考耳古者名吏休暇曰告漢律二千石有予告有賜告
予告者任官有功最法所當得也賜告者病滿三月當
免天子優賜其告使得帶印綬將官屬歸家治病也至
成帝郡國二千石賜告不得歸家和帝世予賜皆絕此
孟康說也汲黯病免三月上常賜告者數終不愈至谷

永病三月有司奏請免馮野王之守琅瑯也病滿三月
賜告御史中丞劾奏野王賜告養病而私自便持虎符
出界歸家竟免野王即此事也

漢官

漢官無內外輕重之別選郡國守相高第為中二千石
為御史大夫又選博士諫大夫通政事者補郡國守相
其所以為內外制者未嘗不均一也文帝召季布於河
東以其使酒而復遣之郡若有意於重內者然詔遣列

侯之國為吏雖丞相周勃有所不能辭則又豈不以為
重是以嚴助厭承明而出補為會稽守非以內為輕而
外為重也其均佚之禮則然也蕭望之雅意本朝而不
樂平原守非以外為輕而內為重也其愛君之心則然
也故助自會稽召留侍中望之自平原入為少府其出
入內外安有輕重區別哉然汲黯沮於弘湯而不得久
居位雖有出入禁閤拾遺補闕之願而不克遂京房沮
於石顯而出為魏郡守雖有通籍殿中以防壅塞之請

而不得行若是而人臣之顧位有內外決擇之心其亦由君見之不明也哉漢官無文武之分高祖當征戰日不暇給之際過魯而祠孔子至沛而作樂歌之後此其中持文武之權衡輕重相準以貽後世並用長久之術其意微矣議者徒見高帝不喜儒生而思猛士謂其尚武而不尚文抑不知文武一道其相須以為用高祖固未嘗二其所思也當勇力爭奮之時而董公仁義之言而不以為迂及拔劍擊柱之頃而叔孫通禮儀之制亦

以爲當援詩書於馬上而聽留侯韜畧之謀寓歌詩於大風而善陸賈新語之奏此其機已發於過魯至沛之日矣至於文帝之好元默若尚文者而講武習射不廢於平時武帝之喜征伐若尚武者而制度典章焜耀於當代言其取士則以孝廉賢良選於內郡以兵法勇猛選於邊郡而文武莫不並用而無遺言其用人則以武弁期門轉爲諫大夫以諫大夫復遷爲執金吾而文武之材莫不更迭而不偏也漢置大夫專掌議論句其事

疑似而未決則合中朝之士雜議之自兩府大臣而下至博士議郎皆得以伸其已見而不嫌於卑抗尊也故罷郡國廟則有議韋玄成賞邊功有議陳王傳入谷免罪有議蕭望之賈誼為博士詔令下諸老先生未能言誼代為之對未嘗以公卿之言而廢誼之對也呼韓邪單于願保塞朝臣集議卒用郎中侯應之策未嘗以將相之言而格應之奏也匈奴傳朱博得罪議其獄者五十八人而諫大夫龔勝等敢於異將軍二千石之議也

王嘉得罪議其獄者六十人而少府猛等敢於抗驃騎將軍御史之議也不緘默以因人不雷同以附勢不合黨以濟奸不託公以行私惟盡其已之所欲言而付之人主之獨斷此漢之集議所以有公天下之意然至於屯田之功既成有詔罪前言不便者馬邑之舉既敗獨罪首謀以謝天下此又足以戒謀議之不謹者也雖然高帝之十二年立諸侯王則有議呂后之二年定列侯位次則有議是時他官猶未預也文帝至邸丞相謹與

列侯吏二千石議是時博士猶未預也吳公薦賈誼為博士每詔令議下盡為之對而後元之詔曰令吏二千石博士議至是博士始預議也及武帝時尋朔方之議朱買臣以中大夫預挾弓弩之議吾丘壽王以光祿大夫侍中預武帝之時集議雖廣而意則欲以宿衛誼外庭也

漢官諫員史官經筵

自漢以下異於古者三諫員也經筵也史館也古者諫

官無常員工執藝事以諫諍誦詩士傳言至武帝元狩
五年始置諫大夫後更名光祿大夫自此諫官有常員
矣古者左右前後皆通明經術之士如伊尹作伊訓周
公陳王業援引古義以訓導人主至漢武猶有古意從
兒寬受四書又從歐陽生問尚書是也自成帝置金華
殿講業而鄭寬中張禹得以入講經於殿中非講業之
官不得執經以訓人主自此經筵有常所講業有常人
矣古者左史書言右史書動秦漢以來御史主柱下方

書則親近人主而去堂陛不遠凡郡國上計先達御史
後至丞相是以太史公紬金匱石室之書以作史記而
武帝不美之迹彰而不隱所以公道修明史皆實錄延
及於唐宰相始監修國史夫直筆之職苟上有重臣安
望其肆意極言哉以史攷之漢石渠東觀之士與五經
諸儒雜論同異而可為優者施讎也經學精熟遣奉使
以問諸儒得其義者梁丘賀也劉向初受谷梁蕙能論
五經歐陽生以尚書從兒寬此四子者講論於石渠之

人也李尤字伯仁當和帝朝以文章顯賈逵薦其有相
如楊雄之風因受詔而作賦黃香強學經典能文章京
師有天下無雙之號如劉珍之與馬融校定五經諸傳
記百家藝術高彪由孝廉試經第一數奏賦頌奇文此
五子者讎校於東觀之人也晉左太冲為三都賦自以
所見不博求為秘書郎遂減機雲之價唐李邕欲益文
選注自以為讀書未廣願為秘書未幾與篇隱帙了辨
如響夫以太冲李邕一詣秘閣讀平生未見之書亦足

以慰宵中所期矣則館閣者國家右文之地所以待非常之人人莫不願得之亦以榮也是以漢開石渠而劉向韋玄成施讎周堪之輩出天祿開則揚雄之徒聞蘭臺築而班固傅毅於是乎進東觀設而黃香盧植蔡邕馬融於是乎登白虎闢而賈逵丁鴻由是而升漢之人才出於秘省臺閣者也自唐開麗正藏書而馬懷素褚無量出焉開集賢而張說徐堅元澹賀知章出焉此唐之人才出於秘省臺閣者也漢唐數子皆表表著見於

青史者外又漢有金馬之選唐有蓬萊之遊特出武帝
太宗一時之遇臣下者又不在于秘書臺閣之數焉

漢加官

郎中

爵

吏祿

漢加官之制何也侍中左右曹諸史散騎中常侍皆加
官也所加或列侯將軍卿大夫或郎中無員數多至數十
人給事中亦加官所加或大夫博士議郎掌顧問應對
皆本於秦制然張辟強於惠帝時為侍中賈山至言亦
曰舉令方正之士使為常侍諸吏則加官在漢初不廢

也至武帝始重加官之權加侍中者如吾丘壽王為侍中中郎孔安國為侍中以儒者掌御孟之類加諸曹者如辛慶忌為左曹中郎將之類加諸吏者如楊惲為諸吏光祿勳之類加散騎者如張勃為散騎諫大夫之類加給事中者如終軍為謁者給事中之類獨二府不得兼魏相以御史大夫兼給事中為分霍氏權非定制也或以奉車駙馬為加官非也荀氏漢紀杜佑通典並不列於加官即此可攷也漢郎官之制何也光祿勳有議

郎中郎郎中皆無員多至千人中郎有五官左右三將
郎中有車戶騎三將主車曰車郎主戶衛曰戶郎凡郎
官皆主更直執戟宿衛諸殿門出充車騎惟議郎不在
直中故省中郎曰中郎散郎曰外郎汲黯曰臣願為中
郎出入禁闥補過拾遺郎官故事令郎出錢市財用給
文書乃得出名曰山郎羽林以六郡良家補武帝以便
從獵還宿殿陛岩下故曰岩郎期門為虎賁郎郎選其
塗非一有以父兄任子弟為郎者袁盎劉向是也有以

富訾為郎者張釋之司馬相如是也有以上書獻策為郎者婁敬主父偃是也有以孝著為郎者馮唐是也有以戲車為郎者衛綰是也有以格五為郎者吾丘壽王是也有以從軍善射為郎者李廣鄭吉有以經明甲科為郎者召信臣王嘉是也仲舒對策總云吏二千石子弟選郎吏又以富訾者蓋多出兩塗也夫所謂爵者何也秦爵二十等自公士一級以上至不更四等則比士大夫以上至五大夫凡五等則比大夫左庶長以上至

大庶長九卿之義也關內侯比古圻內之子男列侯比古列國之諸侯漢初因之凡爵一級直錢二千有赦則賜民爵一級有罪則許民買爵以免罪公大夫以上者得與令丞抗禮爵五大夫者有罪不入狴犴爵士造以上者當刑減一等爵非公乘以上者無得冠劉氏冠爵至五大夫以上者乃得復一人以樊噲夏侯嬰傳攷之則爵之遷轉次第有不可紊也然後又有武功爵一曰造士二曰閑興衛三曰良士四曰元戎士五曰官首六

曰秉鐸七曰千夫千夫以上得免繇役八曰樂卿九曰
執戎十曰政戾庶長十一曰軍衛蓋武帝外事四夷內
興功利國用空竭不足以奉戰士有司議令人得買爵
及免罪請置賞官名曰武功爵諸買武功爵官首者試
補吏先除千夫如五大夫其有罪又減二等爵得至樂
卿以顯軍功軍功多用超等大者封侯卿大夫小者即
吏道雜而多端則官職耗廢矣若夫封侯之爵則有二
等曰王曰侯皇子而封者謂之諸侯王王子而封侯者

謂之諸侯羣臣異姓以功封者謂之徹侯大者不過萬家小者五六百戶以為差降有見任宰相而封侯者如曹參以平陽侯王陵以安國侯陳平以曲逆侯周勃以絳侯公孫弘封平津侯是也或以功封如霍去病比再冠軍封為冠軍侯趙破奴從驃騎將軍封為從驃侯或以地名如蘓建為平陸侯以伉為宜春侯是也或以意名如張騫為博望侯取其廣博瞻望霍光為博陸侯取其博太平陸是也有以匈奴降者封為侯孝文世乃有

弓高襄城之封孝景世初開封賞之科而徐盧等畢侯
矣又有侍伺候鄧禹傳載禹孫康以侍伺候為越騎漢
官儀注云其非朝侯侍伺而以下土小國或以肺腑宿
親隨時見會謂之猥諸侯東漢又有謂之四姓小侯者
其食邑比二十級之爵惟徹侯乃得食縣其次關內侯
本無食邑其有加異者列之關內之邑食其租稅餘十
八等大庶長以下如吏職耳每戶一歲更輸錢二百貨
殖傳所謂千戶之君則二十萬是也有累爵至列侯而

未有食邑者樊噲是也有累賜食邑而後封侯者酈商
是也顏師古以為楚漢之際權設寵榮假其位號或得
邑地或空受爵此例多矣列侯有餐錢有奉邑高后紀
丞相平言列侯幸得賜餐錢奉邑是也其吏祿也自三
公而下至百石吏祿各有差其見於百官表之注者皆
以穀計也至所謂丞相大將軍俸錢月六萬是漢祿多
而錢少貢禹拜諫議大夫秩八百石奉錢月九千二百
蓋寬饒以太中大夫擢為司隸校尉俸錢月數千當時

亦以為祿厚加之節臘有賜士大夫足以養廉而無冒
耻干祿之態惟小官卑秩稍祿既薄而賞賜不及焉則
不能以自奉此東方朔所以借侏儒而諷上也宣帝憫
小吏之勤事於是益百石以下俸十五哀帝又益吏三
百石以下俸自是小吏稍稍優游光武中興其千石以
上減於西京舊制六百石以下增於舊秩是光武之減
吏祿乃所以益小吏也

唐定俸祿之制以民地租充分官為九品而給米各

有差凡京文武官每歲給祿以計者總十五萬有奇
而在外不與其俸錢則以公廨錢充攷之通典在京
每歲亦十五萬是唐初俸祿久與米相等矣
宋朝祿令定於嘉祐往往俸錢多於祿米

漢官不分流品 鄉評 任子 雜流

待詔 辟除 薦舉 守試

漢之用人不分流品視其才能勲績等而上之無有限
格周勃以引強申屠以蹶張薛宣以書佐魏相以卒史

皆致位為丞相然其入仕之始等級次第亦自有品節存乎其間其以明經文學進者多除博士或大夫侍中如嚴助朱買臣疏廣平當之徒是也其以材武勇猛進者多除中郎將驂乘如公孫賀衛瑄是也張湯以法律進則先以法官處之故張湯為內史丞相掾薦補侍御史後為廷尉皆法官也黃霸以入粟補官則先以財賦處之故伯始以卒史領郡錢穀計簿書正以廉且察補河東均輸長皆掌財也雖其始有所分別而積功累勲

無不可任者此漢官未免乎雜也終漢之世清濁混殺
上下無別以官者典領中書以醫術校書秘閣尚書郎
掌代王言而以令史久次補之宜乎丁邯耻以孝廉為
郎也漢之取人猶用鄉評武帝求賢良國人共推公孫
弘以充賦萬石君以孝謹聞郡國特以其子為郎中令
一推兜寬則曰知之久矣一言蕭望之則曰此東海蕭
生耶一薦龔勝則曰固已知其名至於酈食其家貧落
簿縣中謂之狂生韓信家貧無行不得推擇為吏陳湯

丐貸無節不為州里所稱是故能自持於鄉里然後州縣拔為幹佐曹史能自立於州縣者然後五府辟為曹掾能自效於五府者然後為朝廷所選用也是以高祖之初鄉縣各置三老相帥為善而設為孝廉之科以取士其殆有意於鄉舉里選之遺意乎漢之取人有出於仕子者二千石九卿得蔭子弟為郎其為虎賁諸郎者皆許父老而子代之或沒於刺守而名績昭著亦蒙恩典錄其後嗣如汲黯張安世皆以父任而素盜亦以父

任為郎光祿勳歲以四行察其茂廉才迹優異始蒙選
舉銓居高第然後出補長丞異時遷擢上而至於兩府
初無限格然考之於史貢禹以光祿勳大夫二千石秩
惟有一子猶未得祿後以御史大夫卒始以特恩任其
子為郎桑弘羊為御史大夫自以為有功於國欲為子
弟得官而武帝不與則漢之奏蔭雖有定制亦未始有
常恩也漢之取人有出於雜流者蕭何著試吏之法以
六體書而課最者為尚書御史書令史至於大學選用

文學掌故之士則有補左右內史鴻臚卒史者以至二千石屬者故兒寬以射策補為尉卒吏龔勝以明經為郎史路溫舒既為獄吏而又以通春秋舉孝廉薛宣朱博皆起於書佐察廉補令丞而終至於登宰相東漢三公有長史有府掾而朱穆何敞班彪李膺之徒卒由此途用則知漢之胥吏亦以功次遷而無所限格也漢世凡以才伎召而未有正官者皆云待詔有待詔公車者有待詔金馬門者有待詔丞相府者有待詔保官者有

待詔承明之庭者有待詔黃門者蓋其為制初無定地而奉祿薄厚亦往往不齊待詔公車東方朔之類是也待詔金馬門公孫弘之類是也待詔丞相府劉德是也待詔保官周慶丁姓是也待詔承明之庭揚雄是也待詔黃門李尋是也按尋之待詔也自言過隨衆賢待詔合太官衣御府久注玉堂之所則可見矣漢有辟除之制有尚書選部自縣令以上始赴尚書調選其餘郡縣之屬吏至於公府之掾曹各自辟於其長其諸侯王國

自內史以下皆得以自除故曹吏拔於州縣者然後為五府所辟五府舉掾曹然後為朝廷所用推而至於公卿之尊初未始有限也故何武以大司空而辟鮑宣為西曹掾史高領尚書事而辟康衡為義曹史此曹掾之辟於公府者也周景以刺史而辟陳蕃為別駕王渙以方城令而辟仇覽為主簿此屬之辟於郡縣者也漢有薦舉之制河南守舉賈誼益州守舉王褒河南守舉終軍是郡國薦士也太府舉張湯四府舉辛湯五府舉段

會宗是公府薦士也暴勝之以直指薦雋不疑閭崇以
執金吾薦龔勝王商以衛將軍薦鮑宣何其薦舉之寬
也至於嚴延年舉獄吏賊不入已猶坐貶秩陳勃舉茂
才不以實亦坐削戶二百何武坐舉方正者槃辟失禮
有司以為詭衆虛偽而左遷蓋漢薦舉之路廣而同坐
之法嚴也漢世凡官吏有守試之法趙廣漢守京兆尹
滿歲為真尹翁歸守右扶風滿歲為真韓延壽守左馮
翊滿歲稱職為真張敞守太原滿歲為真蓋諸官吏初

除皆試守一歲乃為真食全俸也唐世除吏尚循此制
裴度自司勳郎中知制誥為中書舍人白居易行其制
曰臺郎滿歲班列當遷綸閣之職所宜真授又韓愈權
知國子博士三歲為真其所謂滿歲三歲雖若各有其
別然大率皆漢制也故通典載正觀令曰散官以職官
高者為守職事卑者為行官階相等無行無守高官兼
攝下司者自漢世以來謂之領宣帝世張安世以車騎
將軍元帝世蕭望之以前將軍成帝世王鳳以大將軍

兼領尚書事是也

羣書考索後集卷二十二

欽定四庫全書

羣書考索後集卷二十三

宋 章如愚 編

官制門

漢太初官名

武帝改易官制大抵侵紊公卿之職而成左右之勢廢先朝之舊典設官分職率爾改圖者其弊一至于此漢高帝紀綱大基庶事草創而丞相宗正二官之置率不

過因秦舊名歷惠歷文一意休養迄于景帝雖號稍有更
革然自太常廷尉至于太守十餘官之外無他聞焉恭惟
世宗才雄畧大覈出千古凡厥制作既已爭先儷美於
前代令主而官名之定至太初之元而又加詳焉故以
郎中令為光祿勳以典客為大鴻臚以大農令為大司
農以中尉為執金吾而列卿武官之名定焉以祠祀為
廟祀以中大夫為光祿大夫以家馬為廝馬以行人為
行令而太常光祿太僕鴻臚屬官之名定焉以考工室

為考工以左弋為攸飛以居室為保官以甘泉居室為
昆臺以永巷為掖庭以東園主章為木工而少府將作
大匠屬官之名定焉以右內史為京兆尹以左內史為
左馮翊以主爵都尉為右扶風以諸侯王之太僕為僕
而三輔之官與侯國之卿定焉至若置太卜於太常輅
輅於太僕別火於鴻臚建章營騎於光祿則帝之命名
又皆有深意信乎足為一代之法程也初帝在建元二
年常省太尉之官明年置期門又明年復廷尉自是稍

有損益若五經博士若大司馬若司直若諫大夫若水衡若部刺史若三輔都尉既各因事以建官因官以立名至是歲也又定為徽號而易他官之弗雅馴者焉其後如司隸之直如羽林之更如直指之選曰搜粟曰屬國曰農曰奉車曰駙馬則以命都尉之官者也曰中壘曰屯騎曰步兵曰越騎曰長水曰胡騎曰射聲曰虎賁曰護羌則以命校尉之官者也事有一官官有一名名有一義小大相屬內外相維文武相資以濟登一時之

治則帝之豐功偉烈挺然為王制之右者其以此夫

漢刺史

漢置十三部刺史按地理志云周改禹徐梁合於雍青分冀以為幽并武帝攘却胡越開地斥境南至交趾北至朔方之州兼徐梁幽并并夏周之制改雍曰梁改京曰益凡十三部置刺史以此攷之則是初置十三州刺史乃是禹貢九州之外加以幽并及交州朔方為十三也刺史之置在元封五年後十五年至征和四年始置

司隸初猶未領郡也後始察三輔三河弘農近郡云然
郡守秩二千石而部刺史止六百石成帝時何武翟方
進言刺史位下大夫而臨二千石輕重不相準失位次
之序請罷刺史更置州牧成帝從之逮哀帝時朱博請
罷州牧置刺史未幾改為牧光武中興建武十
八年罷州牧

而置刺史此刺史度置之太畧也部刺史既專以督察
郡國為事凡二千石長吏有善狀者皆得以薦達于
朝章帝世馬嚴奏故事州部所舉上奏司直察能否以

懲虛實觀此則知漢刺史雖任以督察而其防檢之法亦不為不備矣此刺史薦舉之制也部刺史專以進退二千石長吏為職成帝故時朱博刺冀州行部吏民數百人遮道自言博使從事為曉諭吏民欲言縣丞尉者刺史不察黃綬各自詣郡欲言二千石墨綬長吏使者行部還詣治所觀此則刺史所職特守令而已此其職之所止也世祖中興喜任明察舊制州牧奏二千石長吏不任位者事皆先下三公三公遣掾史案驗然後黜

退至是不復委任三府而權歸刺史之吏朱浮上疏言之此可見刺史劾奏之制也百官志云諸州常以八月巡行所部郡國錄囚徒攷殿最歲盡詣京師奏事王尊傳云瑯琊王陽為益州刺史行部至邛郫九折阪歎其路險何武傳武為刺史行部必先即學宮見諸生試以誦論問其得失此皆述其行部之制也刺史歲盡輒奏事京師翟方進刺朔方傳云所察應條輒舉再三奏事遷丞相司直谷永刺梁州傳云奏事京師訖當之部何武

刺揚州傳云每奏事至京師戴聖未嘗不造門謝恩此
皆其事也至建武十一年初斷州牧自還奏事蓋自是
而絕

後志云刺史歲京師奏事光武但因計吏不復奏事
矣

此刺史奏事之制也漢世刺史專以六條察二千石朱
博為冀州刺史行部不察黃綬何武為揚州刺史所舉奏
二千石長吏必先露章服罪者為虧除免之而已是二

者可謂得刺史之體至於鮑宣舉措煩苛代二千石署

吏聽訟所察過詔條則勢偏郡國侵預其事初文帝時魏

尚

馮唐傳

為雲中守軍市之租盡許以給士卒其於恩賜

間里止令丞尉親行自致

文紀元年

而歲時遣表丞相掾史

按行郡國每有調發則虎符參合以為驗

文紀二年

未聞遣

使以生事者也武帝一切務興功利一介之使矯制州

郡則發倉粟鼓鹽鐵誅渠帥以興轉漕

司馬相如

斬司馬以

調樓船

助嚴

上於是始遣命使以行郡國則州郡之權盡

出於天子之使長安貫馬不具則當斬

汲黯傳

內史負租

課殿則當免

兒

會稽守計簿不上則賜書詰責甚者均

輸鹽鐵等官分布措置

元封五年初置部刺史

則州郡無一孔

之遺繡衣直指之使誅斷斬伐而州郡無一日之寧末

年奸宄遂至於不可制蓋州郡之權輕動有牽制而不

得逞及沈命之法嚴州郡惟恐自累而得罪宣帝懲武

帝縱橫之弊一切還州郡之權而魏為相時遣掾吏按

事郡國所奏者不過風雨災變而已長安吏民鬪殺橫

道親過不問蓋不肯以一毫職外之事而侵郡國之權
是以趙廣漢守京兆請令長安游徼獄吏秩皆百石張
敞相膠東諸吏捕盜有功者一切比三輔尤異 看張
趙二事見帝留意吏治其寵任守相者至此

黃霸治河南則獨用寬和為名龔遂治渤海則得一切
便宜從事且無拘於文法可以見假借諸郡國至此爾
故嘗謂文帝在位未嘗遣使遣使之煩自武帝始勸農
種麥則遣謁者元狩三年秋遣存問鰥寡則遣博士元狩六年夏遣昭

帝遣廷尉問民疾苦

元始元年遣王平等五人

宣帝遣御史掾舉寬

獄

五年鳳

元帝以方田作時丞庶失業則遣光祿大夫褒

等十二人

初元元年

以郡國水災而不能以自振則遣光祿

大夫嘉等十一人成帝時旱

河平四年

或遣太中大夫存問耆

老

永始四年

或遣諫大夫舉三輔寬獄至食貨志則又有好

農使溝洫志則又有河隄使者谷永傳又有護苑使者

皆隨事而置也非特此也漢郡國亦皆有他官按地理

志京兆馮翊等郡則有鐵官渤海東萊等郡則有鹽官

太原郡則有家馬官河內成都則有工官陳留齊郡則有服官南郡有發弩官江夏有雲夢官廬江有樓船官九江有陂官有湖官千乘郡有均輸官丹陽郡有銅官巴郡有橘官遼東郡有牧司苑官南海交趾郡有園官有羞官蜀郡有木官此皆領於朝廷之官而布在郡國後志曰凡郡國出鹽多者置鹽官主鹽稅出鐵多者置鐵官主鼓鑄有工多者置工官主工稅物有水池及魚利者置水官主平水收魚稅此皆漢制之可攷者也

漢武帝元狩元年詔曰朕嘉孝弟力田哀夫老耄孤寡鰥獨或匱於衣食甚憐憫焉其遣謁者巡行天下存問致賜

元狩三年遣謁者勸有水災郡種宿麥

元狩六年遣博士大夫六人分循行天下存問鰥寡廢疾無以自振業者貸與之

漢昭帝始元元年遣故廷尉王平等五人持節行郡國問民所疾苦寃失職者

始元二年遣使者賑貸貧民無種者

始元三年鳳皇集東海遣使者祠其處

漢宣帝元康四年遣太中大夫彊等十二人存問鰥寡覽觀風俗

五鳳四年以前使使者問民疾苦復遣丞相御史掾一十四人循行天下舉冤獄察擅為苛禁深刻不改者漢元帝初元元年方田作時朕憂烝庶之失業臨遣光祿大夫褒等十二人循行天下存問耆老鰥寡孤

獨困乏失職之民

建昭四年間者陰陽不調五行失序百姓饑饉惟庶之失業臨遣諫大夫博士賞等二十一人存問者老鰥寡孤獨困乏失職之人

漢成帝建始三年元元寃失職者衆遣諫大夫林等循行天下

河平四年遣光祿大夫博士嘉等十一人行舉瀕河之郡水所毀傷困乏不能自存者財振貸其為水所

流壓死不能自葬令郡國給槨積葬埋

陽朔二年關東大水流民欲入函谷天井壺口五阮
關者遣諫大夫博士分行視

鴻嘉元年方春生長時勿苛取臨遣諫大夫理等舉
三輔三河弘農冤獄

鴻嘉四年水旱為災關東流冗者衆已遣使者循行
郡國被災害什四以上民貲不滿三萬勿出租賦貸
未入皆勿收

漢平帝元始元年遣諫大夫行三輔舉籍吏民以元
壽二年倉卒時橫賦斂者償其直

漢守令

漢郡守地大而權重故二千石得以專制而有以盡其
才趙廣漢將兵屬蒲類將軍擊匈奴朱買臣將兵與橫
海將軍擊東越是其兵得以自將而征討矣朱博召見
諸曹吏書佐及縣大吏選視其可用者盡斥罷諸病吏
薛宣移書屬郡黜陟易置惟其所為是其僚吏得以自

進退矣文翁減省他用而自興學校尹翁歸論治東海
大豪而一郡莫敢犯禁是其財賦刑獄又得以斟酌輕
重而自用之矣然觀張敞與朱邑書曰值敞遠守劇郡
馭於繩墨曾臆約結固無奇也雖有亦安所施龔遂之
為渤海亦願丞相御史且無拘臣以文法得一切便宜
從事則知宣帝固知懼其專制而馭之以法矣夫是以
漢之太守地雖大其權雖重俯首聽命惟上所令而不
聞其跋扈難制之患盖上有馭之之道也杜延年吾丘

壽王一以治郡不進盜賊竊發則璽書詰責之而治行
第一課最上聞者有增秩賜金之寵責實之政嚴賞罰
之用明此漢之所以多循吏也然漢自武帝以來凡侍
從左右之士如中郎太中大夫及博士以上初無遷轉
之法必補守相外任或治効昭著則入補九卿若治郡
無狀則不復升矣是以人皆樂從而治郡亦多勉勵此
亦良法也嚴助以中大夫守會稽上賜書曰君厭承明
之廬勞侍從之事懷故土出為郡吏是也以其三年不

上計則因留侍中不復與轉他官矣朱買臣亦以中大夫守會稽破東越有功召入為主爵都尉列為九卿汲黯亦以中大夫守東海歲餘稱治召入為主爵都尉列為九卿兒寬以中大夫遷左內史議封禪稱意即為御史大夫公孫弘以博士一歲至左內史為內史數年遷御史大夫蓋自侍從左右出補守相乃漢初之法武帝用之甚彰明也宣帝頗留意守相申明武帝法選博士諫大夫通政事者補郡國守相蕭望之以丞相司直守

平原不樂乃上疏以為出諫官以補郡吏所謂憂末而忘本此乃不知漢之典故而持此論耳由是觀之內秩卑而出當外任無不效功而樂進若內秩崇而補出為左遷雖賢者亦不樂此若雖有侍從文學之才而不明於政事不得選用則老於郎中大夫之間而終不得越遷東方朔言武帝既招英俊程其才能用之如不及時國家多事自公孫弘以下至司馬遷皆奉使方外或為郡國守相至公卿而朔嘗至太中大夫後常為郎與枚

臯郭舍人俱在左右恢諧而已枚臯傳言臯拜為郎媒
黷貴幸比東方朔郭舍人等而不得比嚴助之得尊官
蓋可見也漢制萬戶以上為令其秩千石至六百石不
為卑矣有丞尉以佐治又有三老嗇夫游徼相與助其
縣事故凡舉賢良孝廉茂才直言者皆得遷補焉其或
郡縣吏勞績著光祿勲舉四行亦得為令議者以循吏
傳不紀縣令往往以令為卑而不知漢之待縣令顧亦
不輕魏相以茂陵令而遷刺史焦延壽以小黃令以課


最而增秩盖未始視令為卑秩也至於境有盜賊不專責之任而責之游徼朱博是也刑有非常則已或造獄而不拘於律王尊是也韓延壽為左馮翊不肯出行縣曰縣皆有賢令長督郵分明善惡於外行縣重為煩擾朱博為琅瑯太守不肯令掾行縣曰縣自有長吏府未嘗與也薛宣得吏民罪名使縣長吏自行罰不欲代縣治若是者又皆縣令得以自為而不制於州郡故能不迫於勢不拘於職盡其已之所當為而騁其長才未始

一切束於郡太守也漢初縣令長無表見著聞者武宣而下始聞見之選補之初說者以為自郎以上至于中郎凡四等專以待補縣令故後漢猶言郎官出宰百里然詳而攷之亦豈盡出於郎官也蓋有自孝廉舉者趙廣漢王尊是也有自賢良舉者魏相貢禹是也有自直言舉者王尊是也有自方正舉者房鳳是也有自茂才舉者薛宣龔勝是也有自四行舉者何武是也有自能治劇而遷者陳遵尹賞是也有自郡吏積功而遷者朱

博王訢是也則進之路亦廣矣然必出於天子之命
非州郡所能辟置故張敞補吏有功者數十人為縣令
必上名尚書雖薛宣使兩令換縣亦必奏聞而後行事
此其實也至於治迹著頃刻超遷之賞亦厚故有遷郡
守者王尊魏相是也有遷刺史者朱博是也有遷諫大
夫者劉輔是也有遷京輔都尉者趙廣漢王訢是也有遷
御史中丞者薛宣是也亦有吏民所愛而增秩復留者
焦延壽是也然治漕運如卜式除盜賊如尹賞舉廉吏

如薛宣無非其職者甚者魏相為茂陵令訐御史傳者至
於棄市何武為長安令侍中犯法者至於斷頭權任亦可
謂重矣然有謁郡守則步入府而因吏謁迎天子之使
者則負弩矢而前驅督郵察縣得以按劾記檄見及不
免解印甚者繡衣使者至欲斬王訐買馬不具至於斬
長安令恩遇不降莫此為甚此汲黯所以稱疾歸田里
孔光所以自免歸教授貢禹一受責而免冠即去也前
漢每有詔下言守而不言令至後漢稍重其權故明帝

嘗詔不得緣辱黃綬詔下始言守令矣



羣書考索後集卷二十三

欽定四庫全書

子部

羣書考索後集卷二十四

詳校官中書臣寶汝翼

主事臣祁韻士覆勘

總校官知縣臣楊懋珩

校對官中書臣徐夔雲

謄錄監生臣郭洽怡

欽定四庫全書

羣書考索後集卷二十四

宋 章如愚 編

官制門

歷代守令

自秦廢封建之法罷侯置守漢興孝文始為銅馬竹使
之符而景帝立未釐兩轡之制凡以重郡國之任故有
守令入為公卿出宰百里其有治理效者增秩賜金久

任其任故終漢之世風流美績班班可考焉若黃霸以教化治潁川龔遂之儉約化渤海朱邑以存問耆老為心文翁以建立學校為盛信臣以興科勸農而盜賊衰杜詩以誅暴清平而威名赫立以至任延學禮於九真錫光變俗於交趾魏尚廉范之守雲中而匈奴逃遁祭彤陳禪之守遼東而胡蠻威服皆刺史郡守之得人者也至於萬戶之令一邑之長皆有著稱修德則太丘之陳寔教化則雍丘之劉矩卓茂之治密則人愛而不欺

魯恭之治中牟則化及而致異以至董宣之在洛陽劉
昆之在江陵虞詡之在朝歌鍾離意之在瑕丘此皆前
世得人之盛而後世莫及焉及曹魏之世則杜畿之守
河東鄭渾之為沛郡倉慈之抑權右蘇則之撫流俗至
於為令則有若楊沛之宣奉科法焉晉室之興則魯芝
之勉以黃霸胡威之傳父清德鄧攸開倉以振貧曹攄
縱囚而復會至於為令則有劉超之推誠於物焉宋氏
之世間有其人王鎮之之不受俸祿江東之之不營田

業杜慧度之為政纖密則如治其家斯亦顯然而可道者也至於南齊則虞愿以清廉顯於晉安傅琰以奇績顯於山陰南梁則庾革以潔白稱於會稽丘仲父以權變過於劉傳北魏則張鷹清白著稱竇瑗政績聲譽齊宋世良施八條之制盜奔他境房豹以一井得甘泉為政所致降及於隋則有若梁彥光之守鄴郡而以儒學移風俗公孫景茂之治零陵而以秩俸買牛犢辛公義則又有慈母之稱魏德深則有歸市之感漢唐之代多得

其人韋仁壽之鎮撫南寧賈敦頤緝治東洛倪若水隆
儒於汴州薛大鼎興利於滄棣田仁會之暴身致兩韋
景駿以至孝感人擒盜輒捨則元德秀道不拾遺則張
允濟與夫李朝隱之清正剛烈韋抗之不事威刑至於
五代之際猶不乏人如郭延魯之守泌州而父子繼聲
符令謙之治趙郡而號為德政此亦一時循廉之吏也夫
由魏晉以降其間守令之賢雖隨世而有然終不及兩
漢何哉文中子續詩至郡縣之政每傷焉曰其從也雖

有善政未及行也蓋必有久任責成之意而後吏治可興也

漢元功侯籍

自古帝王之興必有英傑之輔經營共其始成始同其功安榮增其眷而悠久襲其慶故太常之書司勳之貳盟府之藏周家之制其有由來矣漢高帝龍興泗濱虎嘯豐谷一時之士咸願效其尺寸以垂著於竹帛始自楚陳之歲魚鱗雜襲填然來附五年而東克項羽趣定

功而行封六年而剖封功臣曹參等皆為通侯蓋始有
通侯之籍矣班氏作史本原其功以為八載之後侯者
百四十有三人有封爵之誓丹書之信白馬之盟又有
十八侯位次之作并述其後以功次定朝位表漢興以
來功臣因其元功之侯籍以昭之夫所謂十八侯者何
也蓋嘗攷之顏師古之注則以為蕭何也曹參也張敖
也周勃也樊噲也酈商也奚涓也夏侯嬰也灌嬰也傅
寬也靳歙也王陵也陳武之與王吸也薛歐之與周昌

也丁復之與蟲達凡十八侯者此其功之尤著者也既定十八侯之位合而言之則百四十三人皆著於籍而謂之元功其尤大者若禹成功而申於帝若旦有勲而封於魯以及其次儼景同番悉傳苗裔若商大蕪而誇爾祖之與若君牙受任而美世勞之紀君之報於臣臣之報於君歷萬世猶一日也自時厥後開廟藏覽舊籍宣帝以隆中興之祚四七佐命按籍咸在光武以傳再造之業揆厥所元皆高皇發之若乃蕭何位第一而居

表之十三曹參為次而居表之首周勃位第四而居表之十四蓋籍以功為序而表以封前後為序也陳平與張良同為腹心平之位乃在四十七而良之位乃在六十二或者曰此良平之智當其以功次定朝位之際自貶以晦其迹而非元功之本籍然班固作泗水亭銘十八侯之次有良平紀通而無奚涓薛歐丁復則知良平之在侯籍本非下第也若張敖本無大功可以為蕭曹平勃之亞而其班乃在三得非以其肺腑之恩乎若表

之序侯者百四十三人而表增十人去其外戚王子而猶為百四十有七人得非其或有所附益乎亦不可不知也其後在孝文時乃有弓高襄城之封而外徠者亦侯在孝景時始開封賞之科而降者亦侯在武帝時興羌越之伐而將帥受爵凡應本約者亦封後世承平頗有勞臣故班固於高惠高后文功臣表之後又表景武昭宣元成功臣輯而序之以續元功之次又所以見其君能繼高帝之志云

漢侯籍本末

高帝五年冬克項羽趣定功行封 六年十一月甲申
始剖符封功臣曹參等為通侯訖十二年侯者百四十
有三人

今謹按史記年表高祖功臣凡百四十三人班固表
位次百三十有七人加呂外戚王子六人亦凡百四
十三人而表尾定數乃曰百四十七人加外戚王子
凡百五十三人固之誤也或者傳寫之訛四十七人

當作三十七五十三當作四十三

封爵之誓曰使黃河如帶泰山若礪國以永存爰及苗裔於是申以丹書之信重以白馬之盟又作十八侯之位次表

高帝與功臣剖符作誓文書鐵契金匱石室藏之宗廟列侯受封畢至於奏位次皆曰平陽侯曹參功最多宜第一然上心欲何為第一鄂千秋曰蕭何當第一參次之上乃令何第一

蕭何曹參張敖周勃樊噲酈商奚涓夏侯嬰灌嬰傳
寬靳歙王陵陳武王吸薛歐周昌丁復蟲達此從第
一至十八也

右見顏師古注

酈侯蕭何第一

今謹按文穎曰酈音贊臣酈曰國在南陽師古曰或
云何封沛郡酈縣才何反非也按地理志南陽酈縣
云侯國沛酈縣不云侯國也孫氏曰有二縣音多亂

屬沛者音嗟屬南陽者音贊茂陵書何封國在南陽
宜呼贊今呼嗟嗟舊字作鄱所由亂也

舞陽侯樊噲第二

留侯張良第三

絳侯周勃第四

平陽侯曹參第五

戶牖侯陳平第六

今謹按世家高帝封平為戶牖侯帝出平城南過曲
逆乃以平為曲逆侯是戶牖為始封而後封曲逆也
今十八侯位次從平始封則位次作于圍平城之前

也曲逆二字在漢書音義亡別音五臣注陸士衡高
祖功臣頌云曲音區句反逆音遇不知何所據漢書
高帝紀云又戰曲遇東蘓林曰曲音齠遇音顒師古
曰齠丘羽反恐地不同非其證也

南宮侯張敖第七

曲周侯酈商第八

潁陰侯灌嬰第九

汝陰侯夏侯嬰第十

陽陵侯傅寬第十一

表謚景漢列侯位次傳謚忠武

信武侯靳歙第十二

安國侯王陵第十三

襄平侯韓信第十四

棘津侯陳武第十五

曲成侯蟲達第十六

汾陰侯周昌第十七

青陽侯王吸第十八

右見班固泗水亭銘

高后二年詔曰高皇帝匡飭天下諸有功者皆受分地
為列侯朕思念至於久遠而功名不著亡以尊大誼施
後世今欲差次列侯功呂定朝位藏於高廟世世勿絕

嗣子各襲其功位其與列侯議定秦之丞相臣平等言
謹與絳侯臣勃曲周侯臣商潁陰侯臣嬰安國侯臣陵
等議列侯幸得賜餐錢奉邑陛下加惠以功次定朝位
臣請藏高廟奏可紀本高后復詔陳平盡差列侯之功錄
第下竟藏諸宗廟副在有司表

呂氏曰自十九臣下皆平所定也平之第在四十七
其自處固善而留侯之第尚在六十二何耶蓋平以
知自將固不與功臣爭先若留侯澹然事外雖序曲

逆之前亦所不願也

高帝素諒雅意在當時先後必畧有定次高后世特因其舊而詮品之耳

曹參位第二而表在首蕭何位第一而表在十三表以

封前後故也

注孟康

高祖自云吾得天下繇張良稱其才也叙位乃以曹參次蕭何校其勤也至如戶數多少或以才德或以功勞亦一定也故稱蕭何位第一戶唯八十張良位第三而

戶過六十他皆類此

師古注

○史記呂后七年丞相平言

武信侯呂祿位侯位次第一請立為趙王

呂氏曰蓋高帝定十八侯位次何第一參第二教第一
三今年盡定諸侯朝位蕭曹皆死必遞遷張敖第一
教既死遂以祿補其處耳

孔衍魏漢春秋曰漢高祖封許負為明雌亭侯裴松之
以為漢高祖時封皆列侯未有鄉亭之爵疑此封不然
景帝子中山王勝勝子貞元狩六年封涿縣陸城亭侯

劉備傳

漢麒麟功臣

宣帝甘露三年單于始入朝上思股肱之美乃圖畫其人於麒麟閣法其形貌記其官爵姓名凡十有一人首博陸侯姓而不名次張安世次韓增次趙充國次魏相次丙吉次杜延年次劉德次梁丘賀次蕭望之次蘓武皆有功德知名當世是以表而揚之明著中興輔佐列於方叔召虎仲山甫焉自黃霸于定國朱邑張敞尹翁

歸夏侯勝等皆以善終著名然不得列於名臣之圖以此知其選矣

蘓武傳

宣帝甘露三年單于始入朝上思股肱之美乃圖畫其人於麒麟閣法其形貌署其官爵姓名

唯霍光不名曰大司馬大將軍博陸侯姓霍氏

次曰衛將軍富平侯張安世

次曰車騎將軍龍頤侯韓增

次曰後將軍營平侯趙充國

次曰丞相高平侯魏相

次曰丞相博陽侯丙吉

次曰御史大夫趙平侯杜延年

次曰宗正陽城侯劉德

次曰少府梁丘賀

次曰太子太傅蕭望之

次曰典屬國蘇武

皆有功德知名當世是以表而揚之明著中興輔
佐列於方叔召虎仲山甫焉凡十一人

又論

博陸侯躬秉節誼定萬世策以安宗廟功德甚茂其
冠群后尊而不名

張安世宿衛忠正勤勞王家

韓增寬和有守世載令聞

趙充國料敵制勝奮威先零

魏相嚴毅廉正總領衆職

丙吉寬厚不伐同心輔治

杜延年典司朝政練習憲章

劉德宗室之良持身謹厚

梁丘賀儒術自進列位九卿

蕭望之忠正不撓經術該明

蘓武執節忘身不辱國命

漢建武封功臣

漢光武以睿明英武之資龍飛白水洗滌氛祲復振炎
統羣臣翼附爰立雋功昆陽既捷尋邑奔殪進拔邯鄲
北州弭定尤來大搶巢穴蕩折銅馬朱鮪先後乞降雖
雄斷廟謨冠軼古昔而出奇畫策推鋒鏖戰抑謀臣猛
將是賴厥既即祚高邑定都洛陽帝懔然不以為已功
推勞于下以建武二年封功臣皆為列侯大國四縣餘
各有差博士丁恭議質古制盛意隆旨曲示優渥乃命
謁者畀以印綬乃頒制策滿溢示戒謹爾侯度傳爾子

孫長為藩屏以固王室若鄧禹則自鄴侯而更封梁陳
俊則自列侯而更封新處蓋延則自建功侯而更封安
平若耿弇之於好畤王霸之於富波任光之於阿陵李
忠之於中水皆更封也若萬脩之於槐里劉植之於昌
城朱祐之於堵陽杜茂之於苦陘亦更封也其定封寇
恂馮異則有雍如陽夏之別其定封吳漢祭遵景丹則
有廣平潁陽櫟陽之號曰固始曰成安則以封李通臧
宮曰昆陽曰伉父則以封傅俊劉隆曰栒邑曰舞陽則

以封宋弘朱浮賈復以冠軍益封而加二縣陰識以陰鄉增封而遜爵邑丁綝以不求美縣而封定陵新安鄉侯史冊所書焜耀烏奕殆與元功侯籍相為終始厥後東克青齊西定隴右庸蜀之區既平既一故建武之十三年班勞策勲更封增邑凡三百六十五人又益盛矣高秩厚禮吏職不任特進朝請加於元勲優游含弘流慶於後計慮深遠何以尚茲至永平之世慨想舊烈而繪象於雲臺逮夫永初聿追盛懿而以紹封大功臣揆

元朔端皆建武之制發之矣

東漢表及本傳建武二年丁恭議封功臣

淮陵侯王霸建武二年更封富波侯十三年增戶邑
更向侯 阿陵侯任光建武二年更阿陵邑萬戶

中水侯李忠建武二年更封中水邑三千戶 槐里

侯萬脩建武二年更封槐里侯 昌城侯劉植建武

二年更封昌城侯 觀津侯劉喜建武二年更封觀

津侯 浮陽侯劉歆建武二年更封浮陽侯

劉植傳王郎起植與弟喜從兄歆率宗族賓客聚
兵數千人據昌城迎世祖建武二年更封植為昌
城侯討密縣賊戰歿子仁嗣帝使喜代將植營復
為驍騎將軍封觀津侯喜卒復以歆為驍騎將軍
封浮陽侯

櫟陽侯景丹建武二年更封櫟陽邑萬戶

傳建武二年定封丹櫟陽侯帝謂丹曰今關東故
王國雖數縣不過櫟萬戶邑耳夫富貴不歸故鄉

如衣錦夜行故以封鄉爾

雍奴侯冠恂建武二年平潁川封雍奴侯邑萬戶

傳建武二年定封恂雍奴侯邑萬戶

安平侯蓋延建武二年更封安平侯十三年增封食

邑萬戶 陽夏侯馮異建武二年定封陽夏侯 廣平

忠侯吳漢建武二年定封廣平侯食四縣

傳建武二年帝遣使者奉璽書封漢為廣平侯食廣平

斥漳曲周廣年凡四縣

禹侯朱祐建武二年更封堵陽侯十三年增邑定封
禹侯邑七千三百戶 高密元侯鄧禹建武二年春
更改梁侯十三年定封高密食四縣

傳建武二年春遣使者定封禹為興侯

膠東剛侯賈復建武二年八月封三縣

傳建武二年益封穰朝陽二縣十三年定封膠東
食六縣

祝阿侯陳俊建武二年更封新處侯十三年增邑定

封祝阿 參議鄉侯杜茂建武二年更封苦陘侯十
三年增邑更封修侯 潁陽成侯祭遵建武二年春
定封潁陽侯

傳建武二年春征虜將軍定封潁陽侯

固始恭侯李通建武二年封

傳建武二年封固始侯

山桑節侯王常建武二年封 郎陵愍侯臧宮建武
二年封成安侯十三年增邑封鄴侯 好畤愍侯耿

弇建武二年封食邑二縣

傳建武二年更封好時侯食好時二縣十三年增

邑

慎靖侯劉隆建武二年封亢父侯

傳建武二年封亢父侯十三年增邑更封竟陵侯

昆陽威侯傅俊建武二年封新息侯朱浮建武二

年封舞陽陵陽侯丁綝建武二年封定陵新安鄉

侯

傳丁鴻父絀建武元年拜河南太守及封功臣時
帝令各言所樂諸將皆占豐邑惟絀願封本鄉
或謂絀曰人皆欲縣子獨求鄉何也絀曰昔孫
叔敖勅其子受封必求境墉之地今絀能薄功
微得鄉厚矣帝從之封定陵新安鄉侯食邑五
千戶後徙陵陽侯

宣平侯宋弘建武二年壬子封桐邑侯

傳建武二年代王梁為大司馬封桐邑侯

羣書考索後集卷二十四